

Borislav Bojić

U okviru poslaničkih pitanja uputio zahtjev Kolegiju Predstavničkog doma – „Dakle, i pitanje i zahtjev. Mi smo na sjednici Komisije za vanjsku trgovinu i carine koja se, nažalost, vrlo često doživljava na način kao da to nije nešto posebno bitna komisija, a mi u samoj komisiji smatramo da jeste bitna. Posebno, pokušao bih se nadovezati na ovaj dio diskusije kolege Kabila u vezi s toksičnim materijama, o čemu se danas mnogo govori u javnosti. Komisija za vanjsku trgovinu i carine tražila je od Kolegija Predstavničkog doma da Vijeće ministara BiH, u što je moguće kraćem roku, s obzirom na vijesti u javnosti u vezi s toksičnim materijama, posebno u mlijeku, obavijesti Predstavnički dom i podnese informaciju, koja bi praktično bila zvanična i javna i koju bi mogli koristiti i javni mediji i svi drugi, o problemima u vezi s toksinima koji se pojavljuju u hrani biljnog i životinjskog porijekla. Logično bi bilo da je i samo Vijeće ministara BiH do sada to uradilo, bez našeg zahtjeva.

Naime, pošto je ovo prilika za poslaničko pitanje, vjerujem da se neće propustiti prva prilika i stoga uz podsjećanje na zaključak Komisije za vanjsku trgovinu i carine, a imam na neki način i obavezu, ja sam kolegama zahvalan što smo zajednički došli do jednog zaključka da se, kada je u pitanju zdravstvena ispravnost proizvoda, dostavi jedna informacija koja bi sadržavala između ostalog... Stoga, konkretno tražim da se ovo pitanje odmah razmatra, prije svega u Vijeću ministara, kada su u pitanju proizvodi za koje je zakonska obaveza da budu kontrolirani, bilo da je riječ o domaćim ili uvoznim proizvodima, zatim proizvodi koji se kontroliraju (odnosi se na domaće i uvozne proizvode), zatim prikaz dozvoljenih i stvarnih količina u pojedinim namirnicama. Sljedeće, potrebno je informirati o vremenu u kojem su obavezne kontrole, zatim pouzdanosti pojedinih kontrola zbog tehničke opremljenosti laboratorija, o čemu su ovdje govorile kolege poslanici.

I na kraju krajeva, način informiranja odgovornih lica i javnosti o nalazima i ostale podatke koji su relevantni za zdravlje stanovništva. Sve to je napisano u zaključcima Komisije za vanjsku trgovinu i carine. Nemam potrebu da dostavljam posebno poslaničko pitanje s obzirom da je ovakva vrsta izvještaja upućena Predstavničkom domu, ali je ovo dobra prilika da još jednom naglasim - pošto ne vidim da u Vijeću ministara BiH ima interesa za pitanjima poslanika, pa se nadam da će bar odgovoriti na pismena pitanja i potrebu da ovo pitanje bude prioritarno u BiH jer je ono, htjeli mi to ili ne, svaki dan prisutno u javnosti – kako bi bilo dobro da od nadležnih institucija bar dobijemo pravovremenu i korektnu informaciju.“